

В ЧЕТВЕРГ 4-Й СЕДМИЦЫ ПО ПАСХЕ
В СРЕДУ ПРЕПОЛОВЕНИЯ ВЕЧЕРА, ОБЫЧНАЯ КАФИСМА.

На Господи воззвах: стихиры праздника 3, глас 4-й:

Подобен: Званный свыше:

Предразоривый державу смерти Христе, смертию Твоею, жизнь подал еси человеком, в славном востании Твоем, совоздвигнувший род человеческий, снисхождением Твоим. Темже благодарственную хвалу Тебе поем, праздник празднующе тридневнаго и светоноснаго Твоего Воскресения, воньже преполовление всечестных ныне дний нам всем просия, Иисусе Жизнодавче, Благодетелю душ наших.

Прежде честнаго Креста Твоего, и страсти, чудес преславная совершай в людех, якоже писано есть посреде праздника законнаго стал еси Христе Всесильне, и всем возопил еси: аще кто жаждет, ко Мне самохотне да приходит, и воды Божественныя пиво да почерпнет, и жизненныя воды: жизни бо воду и силы премудрости Аз всем подаю, яко хотя человеком уподобихся, яко Человеколюбец.

Яко на одре мя лежаща болезни, согрешений моих, Христе Многомилостиве, и разслаблена удасы, яко за великую человеколюбия пучину, Человек волею быв, ныне невидимо мя якоже разслабленнаго воздвигни, и стезями Божественных заповедей Твоих тещи благопоспеши: иже прежде страсти, людем Спасе еврейским, чудес множества предстоя, яко Бог сый волею страждеши плотию.

И Миней 3. Слава: святаго, аще есть: аще ли ни,

Слава, и ныне: праздника, глас 2:

Егда пришел еси во святилище Христе Боже, преполовившуся празднику, тогда люди учил еси, вопия: веруй в Мя, аще и умрет, жив будет. Иудее распыхахуся, с фарисеи и саддукеи и книжники, глаголюще: кто есть Сей, Иже глаголет хулы? не помышляюще, яко Ты еси прежде всех век, со Отцем и Духом славимый: Боже наш, слава Тебе.

Прокимен дне.

На стиховне стихира воскресна, глас 3:

Страстию Твоею Христе, омрачивый солнце, и светом Твоего Воскресения, просветивый всяческая, приими нашу вечернюю песнь Человеколюбче.

Стих: К Тебе возведох очи мои:

Стихира апостольская: Во всю землю изыде вещание ваше святии апостоли, идольскую прелесть разористе, богоразумие проповедавшие: сей добрый подвиг

вашъ есть блаженный. Темже поем и славословимъ ваша память.

Стих: Помилуй нас Господи, помилуй нас:

Мученичен: Мученицы Твои Господи, верою утверждшеся, надеждою укрепившеся, любовию Креста Твоего душевно соединившеся, вражие мучительство разрушиша, и улучивше венцы, со безплотными молятся о душах наших.

Слава, и ныне: глас 3. Германа:

Преполовившуся празднику, славимъ посреде земли спасение Соделавшаго. Посреде убо двою разбойнику, Живот на Древе висяше, и хулящему убо молчаше, верующему же вопияше: днесь со Мною будещи в рай. Сиде во гробъ, плени ада, и воскресе тридневен, спасаяй души наша.

По Ныне отпускаеши: и по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

[Слава: святаго, аще имать. И ныне: празднику]

Ектения, и отпуст.

**В ЧЕТВЕРГ 4-Й СЕДМИЦЫ ПО ПАСХЕ
НА УТРЕНИ,**

На Бог Господь: тропарь праздника глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе. [Трижды]

По 1-м стихословии седален, глас 3.

Подобен: Красоте девства:

Вся человеческая восприим, вся наша присвоив, на Кресте пригвоздитися благоволил еси Творче мой, смерть изволивый претерпети яко Человек, да человечество от смерти избавиши яко Бог. Темже яко Жизнодавцу вопием Ти: слава Христе Воскресению Твоему.

Стих: Во всю землю изыде вещание их * и в концы вселенныя глаголы их.

Апостол Твоих память Господи, уяснил еси яко Всесилен, зане укрепил еси их, страсти Твоя подражати: победиша мужески велиарову силу, темже и прияша исцелений дарования. Тех молитвами Человеколюбче, мир подаждь людям Твоим.

Стих: Дивен Бог во святых Своих, * Бог Израилев.

Мученичен: Облекшеся во всеоружие Христово, и одеявшеся во оружие веры, ополчения вражия мужески низложиште: усердно бо надеждою жизни, претерпесте вся мучителей прещения же и раны. Темже и венцы приясте, мученицы Христовы, терпеливодушнии.

Слава, и ныне: Богородичен:

Пророцы проповедаша, апостоли научиша, мученицы исповедаша, и мы вероухом, Богородицу Тя воистинну святую. Темже и величаем Рождество Твое несказанное.

По 2-м стихословии седален, глас 8.

Подобен: Премудрости слова:

Стоя посреде святилища, преполовляющуся божественно празднику, жаждай, взывал еси, да грядет ко Мне и пьет: пий бо от сея Божественныя Моея воды, реки из чрева источит велений Моих, а иже верует в Мя, посланного от Божественнаго Родителя, со Мною прославится. Сего ради вопием Ти: слава Тебе Христе Боже, яко богато излиал еси воды Твоего человеколюбия рабом Твоим. [Дважды.]

Воскресение Христово: псалом 50. Канон праздника со ирмосы на 8 и Миней на 4. Кондак и ексапостиларий праздника.

Песнь 1.

Ирмос: Моря Чермнаго пучину, * немокрыми стопами * древле шествовав Израиль, * крестообразно Моисеовыма рукама, * Амаликову силу в пустыни победил есть.

Запев: Слава Тебе Боже наш, слава Тебе

Велия яже паче ума, Твоего Владыко божественая воплощения благодеяния сияют нам, дарове же и благодати, и божественныя светлости, благоподатно истекают.

Пришел еси Христе, светлости Божества испущая, праздника посреди явленно: праздник бо радостен спасаемым еси, и спасения нашею ходатай.

Премудрость и правда, Господи, и избавление, от Бога Ты бысть нам, и от земли к небесней приводя высоте, и Дух Божественный даруя.

Богородичен: Плоть Твоя истления во гробе не виде Владыко, яко составися кроме семене, тления не прият исследованием естества, пресуществене, не работавши.

И святого Минея на 4.

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поюция.

Песнь 3.

Ирмос: Веселится о Тебе церкви Твоя Христе зовущи, * Ты ми крепость Господи, * прибежище и утверждение.

Вод животворных, церкви источник огверзл еси, аще кто жаждет, усердно да приходит и пьет, вопия Блаже. [Дважды.]

От земли убо, на небо вознестися, проявление глаголаше, с небесе же Духа послати обетова Святого.

Богородичен: Иже естеством животворивый, иже от Девы родивыйся Господь, всем верным дарует безсмертие, яко Благоутробен.

И святого Минея на 4.

Катавасия: Приидите, пиво прием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

Кондак, Икос, и Седален святого. Таже:

Слава, и ныне. Седален, глас 8-й.

Стоя посреди святилища, * преполовляющуся божествене празднику, * жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Яко иже верует в Мя, посланнаго от Божественнаго Родителя, * со Мною прославится. * Сего ради

вопием Ти, * слава Тебе Христе Боже, * яко богато излиал еси воды Твоего человеколюбия рабом Своим.

Песнь 4.

Ирмос: Воздвижена Тя видевши церкви на кресте, * Солнца Праведного, * ста в чину Своем, * достойно взывающи, * слава силе Твоей Господи.

Растерзав смерти врата Своею силою, пути жизни сказал еси, и бессмертия двери отверзл еси, иже верую Тебе зовущим, слава силе Твоей Господи.

Преполовление всех и конец имея, и начало яко Безначален обдержал, стал еси посреди вопия, божественных, богомудрии, даров насладитесь.

Яко Бог всех держа власть, яко силен державу низложив смерти, послати обеща Христе Дух Святыи, иже от Отца происходящий.

Богородичен: Даеши богато благодать Тебе поющим, и иже из Тебе Рождышагося Превечнаго Слова, Мати неискусомужная, и согрешением оставление, сим просящи Пречистая.

И святого Минея на 4.

Катавасия: На Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос. Ты Господи ми свет, * в мир пришел еси, * во свет святых обраща, * из мрачна неведения, * верую хвалящих Тя.

Божественных праздник преполовление достигше, совершенное божественныя добродетели постигнути, потщимся богомудрии. [Дважды.]

Яко воистину священно, настоящее торжество, преполовление бо великих праздник, повелевает и светится обоюду.

Богородичен: Ум ангельский не может разумети Твое не изреченное из Девы, и пречистое Рождество, Спасе мой Всесилене.

И святого Минея на 4.

Катавасия: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияюща.

Песнь 6.

Ирмос. Пожру Ти со гласом хваления Господи, * церкви вопиет Ти, * от бесовския крове очищися, * милостию от ребр истекшею Ти кровию.

Преполовление пятидесятницы наста днесь: отсюда божественная убо Пасха, святая светится, просвещающи божественнейшею светлостию, от онуду же Утешителевою благодатию осиявающи. [Дважды.]

Глаголаше в церкви Христе предстоя, иудейским собором Свою славу открывая, и предъявляя сродство к Родителю.

Богородичен: Буди ми Предстательница, и Стена нерушимая, от мірских мя соблазні избавляюща, едина Богородительнице, и божественным светолитием освещающа.

И святаго Минея на 4.

Катавасия: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Кондак, глас 4-й.

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду безсмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Икос. Олядевшую ми душу согрешенми и беззаконии, кропленми Твоих кровей напой, и покажи плодоносна добродетельми. Ты бо рече всем приходящим к Тебе, слово Божие пречистое, воду нетления почерпите, живу же и очищающую грехи, поющим славное и божественное Твое востание, подая Благии иже с высоты сошедшую воистину учеником Твоим Духа крепость, Тебе Бога ведящим, Ты бо еси источник животу нашему.

Песнь 7.

Ирмос. В пещи Авраамския дети персьстей, * любовию благоверия паче, * нежели пламенем опаляеми взываху, * благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи. [Дважды.]

Плоть носяща видяще, не разумеша собори еврейстии слова Тебе Божия. Но мы Тебе воспеваем, благословен еси в церкви славы Твоея Господи.

Богородичен: Вышняго освященно Божие селение, радуйся. Тобою бо дадеся радость Богородице, вопиющим Ти, благословена Ты в женах, всенепорочная Владычице.

И святаго Минея на 4.

Катавасия: Отроки от пещи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отец Бог и препрославлен.

Песнь 8.

Ирмос. Руце распростер Даниил, * львова зияния в рове затче: * огненную же силу угасиша, * добродетелию преноясавшися, * иже благочестия любителие отроцы взывающе, * благословите вся дела Господня Господа.

Красен из гроба встав, Своею Божества славою сияя, апостолом Своим Господи явил еси Духа обещание, тем посылая действо, благословите вся дела Господня Господа.

Умертвив ада яко Бог, Живоначалниче, всем источил еси живот вечный. Его же ныне воображают светлейше, светоносных дней сих, радостно вопиющим, благословите вся дела Господня Господа.

Лучы яко солнце Христе правде явися, заря міру послал еси апостолы Своя, носяща Тебе света безсеменного, и неразумия мглу очищающа, вопиющим, благословите вся дела Господня Господа.

Богородичен: Се ныне оскуде яве, от иудина племени князь и вождь: Ты бо Всененорочная родила еси, прежде обещавшаго обетования, иже Христа Бога поющим, благословите вся дела Господня Господа.

И святаго Минея на 4.

Таже: Хвалим, благословим, покланяемся Господеви, поюще и превозносяще во вся веки.

Катавасия: Сей нареченный и святыи день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

И стихословим Честнейшую

Песнь 9.

Ирмос. Камень нерукосечныя горы, * от несекомыя Тя Девицы, * краеугольный отсечеса Христос, * и совокупив разстоящаяся естества: * тем веселящися, Тя Богородице величаем.

Новому и чистому житию, от Христа научившися, сие даже до конца сохранит, полезно вси потщимся, яко да Святаго Духа пришествие примем.

В небесное паки житие звани бывши, ходатайственною силою, излиывшагося даже до рабиа образа, и нас вознесшаю, Сего достойно величаем.

Ты мое смертное Живодавче, обложением безсмертия, и нетления благодатию оболк Спасе, воскресил сей, и Отцу привел сей, временную ми разрушив брань.

Богородичен: Яко корень источника, и вину нетления, Тебе Дево вси вернии уведевше, похвалами почитаем. Ты бо составное бессмертие источила еси.

И святаго Минея на 4.

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Светилен.

Подобен: Небо звездами:

Жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим. [Дважды.]

Слава, и ныне: тойже

На хвалитех стихиры Осмогласника, глас 3-й:

Во свете Твоем Владыко, узрим свет Человеколюбче: воскрес бо еси из мертвых, спасение роду человеческому даруй, да Тя тварь вся славословит единого безгрешного, помилуй нас. [Дважды.]

Христовы заповеди непорочно сохраниши святии апостоли, туне приясте, туне подаваете, исцеляюще страсти душ и телес наших. Темже имуще дерзновение, Того молитесь, помиловаться душам нашим.

Яко светила в мире сияете, и по смерти святии мученицы, подвигом добрым подвизавшеся. Темже имуще дерзновение, Христа молитесь, помиловаться душам нашим.

Слава, и ныне, глас 4-й:

Господи, прежде честного Твоего Креста, празднику преполовившуся, во святилище вшел еси, иудеи со дерзновением уча, Моисеем и в законе Тобою законоположенным, ужасающеся же Христе Твоея премудрости неизреченному таинству, еже на Тя роптанию в себе завистию поучахуся: како Сей весть писмена не учився? Не ведяще Тебе Спаса душ наших.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, ихже краегранесие: Средопядесятницы. Глас 2-й:

Подобен: Доме Евфрафов:

Велий еси Царю, * и велия Твоя держава: * вельми бо обнищав, * великих дарований вселенную * исполнил еси.

Стих: Помяни сонм Твой, * егоже стяжал еси исперва.

Стал еси в храме * источая Твоя струи, * празднику преполовившуся, * и напаяя жаждущия * Божественною благодатию, Благоутробне.

Стих: Бог же Царь наш прежде века, * содела спасение посреде земли.

Спасти мя восхотев, * воплотился еси преславно * от Девы неискусобрачныя, * и посреде храма Твоего * благодать мне источил еси.

Слава, и ныне: глас 8. Иоанна монаха:

Преполовившуся празднику прежде страсти, и славного Воскресения Твоего Господи, был еси уча Блаже во святилищи непокоривыя иудеи, и фарисеи, и книжники, и вопия к ним: жаждай да грядет ко Мне и пьет: веруй в Мя, воды жизни Духа Божественного реки потекут от чрева его: о неизреченныя

премудрости Твоего хваления! Иже вся исполняй Боже наш, слава Тебе.

Таже, Благо есть исповедатися Господеви

Трисвятое. И по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой
водами, * яко всем, Спасе, возопил еси: * жаждай да грядет ко Мне и да пьет. *
Источниче жизни нашея, Христе Боже, слава Тебе.

Таже ектения: Помилуй нас Боже:

Час 1. И отпуст.

В ЧЕТВЕРГ 4-Й СЕДМИЦЫ ПО ПАСХЕ На Литургии

Блаженна от канона праздника, Песнь 1-й, 4-го гласа, на 6:

Моря Чермного пучину, немокрыми стопами древле шествовав Израиль, крестообразно Моисеовыма рукама, Амаликову силу в пустыни победил есть. [Дважды.]

Велия яже паче ума, Твоего Владыко божественаю воплощения благодеяния сияют нам, дарове же и благодати, и божественныя светлости, благоподатно истекают.

Пришел еси Христе, светлости Божества испущая, праздника посреди явленно: праздник бо радостен спасаемым еси, и спасения нашею ходатай.

Слава ..., Премудрость и правда, Господи, и избавление, от Бога Ты бысть нам, и от земли к небесней приводя высоте, и Дух Божественный даруя.

И ныне ..., Плоть Твоя истления во гробе не виде Владыко, яко составися кроме семене, тления не прият исследованием естества, пресуществене, не работавши.

По входе Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жагдай да грядет ко Мне и да пьет. * Источниче жизни нашея, Христе Боже, слава Тебе.

И храма Богородицы, и храма святого. Посем настоящего святого, аще есть. Также кондак храма святого. Слава: святого:

И ныне: праздника: Кондак, глас 4-й:

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 26. [Деян. 10, 34 – 43.]

Во дни оны, отверз Петр уста, рече: поистинне разумеваю, яко не на лица зрит Бог, Но во всячем языке бояйся Его и делаяй правду приятен Ему есть: Слово, еже посла сыном Израилевым, благовествуя мир Иисус Христом: Сей есть всем Господь: Вы весте глагол бывший по всей Иудеи, наченшийся от Галилеи, по крещении, еже проповеда Иоанн: Иисуса, Иже от Назарета, яко

помаза Его Бог Духом Святым и силою, Иже пройде благодатствуя и изцеляя вся насилуванныя от диавола, яко Бог бѣше с Ним: И мы есмы свидетеле всех, яже сотвори во стране Иудейстей и во Иерусалиме: Егоже и убиша, повешше на древе. Сего Бог воскреси в третий день и даде Ему явлену быти, Не всем людем, но нам свидетелем преднареченным от Бога, иже с Ним ядохом и пихом, по воскресении Его от мертвых: И повеле нам проповедати людем и засвидетельствовати, яко Той есть нареченный от Бога Судия живым и мертвым: О Сем вси пророцы свидетельствуют, оставление грехов прияти именем Его всякому верующему в Онъ.

Аллилуиа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 29. [Ин. 8, 12 – 20.]

Рече Господь пришедшим к Нему иудеом: Аз есмь свет миру: ходяй по Мне не имать ходити во тме, но имать свет животный. Реша убо Ему фарисее: Ты о Себе Сам свидетельствуеши: свидетельство Твое несть истинно. Отвеща Иисус и рече им: аще Аз свидетельствую о Себе, истинно есть свидетельство Мое: яко вем, откуда приидох и камо иду: вы же не весте, откуда прихожду и камо гряду: Вы по плоти судите, Аз не сужду никому: И аще сужду Аз, суд Мой истинен есть: яко един несмь, но Аз и пославый Мя Отец: И в законе же ващем писано есть, яко двою человеку свидетельство истинно есть: Аз есмь свидетельствующий о Мне Самом, и свидетельствует о Мне пославый Мя Отец. Глаголаху же Ему: где есть Отец Твой? Отвеща Иисус: ни Мене весте, ни Отца Моего: аще Мя бысте ведали, и Отца Моего ведали бысте. Сия глаголы глагола Иисус в газофилаксии, уча в церкви: и никтоже ят Его, яко не у бе пришел час Его.

Вместо же Достойно, поем ирмос 9-й, глас 8-й:

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Причастен: Ядый Мою Плоть, и пияй Мою Кровь, во Мне пребывает, и Аз в нем, рече Господь. Аллилуиа, [трижды.]